



Broj: KSI-09-67/23

Datum: 28.04.2023. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. stav (2) Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po anonimnoj prijavi od 29.03.2023. godine protiv M.G., iz Brčkog, ulica [REDACTED] broj [REDACTED], šefa Odjeljenja za evropske integracije i međunarodnu saradnju Vlade Brčko distrikta Bosne i Hercegovine, na 53. sjednici, održanoj dana 28.04.2023. godine, donosi

ODLUKU

Postupak za odlučivanje o sukobu interesa protiv M.G., iz Brčkog, ulica [REDACTED] broj [REDACTED], šefa Odjeljenja za evropske integracije i međunarodnu saradnju Vlade Brčko distrikta Bosne i Hercegovine, kao nosioca javne funkcije neće se pokrenuti, obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine.

Образложење

Komisija za odlučivanje o sukobu interesa je dana 29.03.2023. godine pod brojem: KSI-09-67/23 zaprimila anonimnu prijavu protiv M.G., iz Brčkog, ulica [REDACTED] broj [REDACTED], šefa Odjeljenja za evropske integracije i međunarodnu saradnju Vlade Brčko distrikta Bosne i Hercegovine, kao nosioca javne funkcije radi sumnje na postojanje povrede odredaba Zakona o sprečavanju sukoba interesa u institucijama Brčko distrikta Bosne i Hercegovine.

U predmetnoj prijavi se traži od Komisije za odlučivanje o sukobu interesa da ispita povredu odredaba Zakona o sprečavanju sukoba interesa u institucijama Brčko distrikta Bosne i Hercegovine od strane supružnika [REDACTED], jer J.G. obnaša funkciju direktora Direkcije za finansije, a njen suprug M.G. obnaša funkciju šefa Odjeljenja za evropske integracije, budući da i sam Zakon definiše pojam „povezanog lica“ i „člana uže porodice“, u kojem se kaže da je bračni, odnosno vanbračni drug upravo to lice. Osim toga, u prijavi se navodi da je neophodno da se R.M. izuzme od odlučivanja u ovom predmetu, jer je J.G. sestra R.M., te osim toga traži da se ispita i postojanje potencijalnog sukoba interesa između J.G. i R.M.

Članom 2. tačka c) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Komisija je uvidom u Registar javnih funkcija i nosilaca javne funkcije utvrdila da M.G. obavlja funkciju šefa Odjeljenja za evropske integracije i međunarodnu saradnju na osnovu Odluke Gradonačelnika, broj: 01.1-1413EK-001/20 od 31.12.2020. godine.

Članom 22. Poslovnika o radu Komisije za odlučivanje o sukobu interesa propisano je da je stranka u postupku u smislu ovog poslovnika nosilac javne funkcije.

M.G. kao nosilac javne funkcije obavezan je postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Član 2. tačka d) Zakona o državnoj službi u organima javne uprave Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 17/2022-prečišćeni tekst) propisuje da je "Rukovodilac organa javne uprave" lice koje rukovodi jednim od sljedećih organa javne uprave: odjeljenjem Vlade, Direkcijom za finansije, Kancelarijom za upravljanje javnom imovinom i Kancelarijom Brčko distrikta Bosne i Hercegovine pri Vijeću ministara Bosne i Hercegovine, dok je članom 24. stav (4) istog Zakona propisano je da su mandatna radna mjesta rukovodećih državnih službenika su koordinator u Kancelariji koordinatora Brčko distrikta BiH pri Vijeću ministara Bosne i Hercegovine, direktor Direkcije za finansije, šef Inspektorata, direktor Porezne uprave i direktor Trezora.

Članom 9. stav (11) Zakona o direkciji za finansije Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj:19/2007, 35/2017, 3/2019, 34/2019 i 36/2022) propisano je da direktor ima status rukovodećeg državnog službenika na mandatni period.

Kako se u konkretnom slučaju radi o činjenici da J.G., supruga M.G., obnaša funkciju direktora Direkcije za finansije Brčko distrikta Bosne i Hercegovine te je rukovodilac organa javne uprave, shodno sistematizaciji radnih mjesta u organima javne uprave, kako je to definisano Zakonom o državnoj službi u organima javne uprave Brčko distrikta Bosne i Hercegovine i Zakonom o direkciji za finansije Brčko distrikta Bosne i Hercegovine ista se nalazi na mandatnom radnom mjestu rukovodećih državnih službenika, te se ne smatra nosiocem javne funkcije shodno Zakonu o sprečavanju sukoba interesa u institucijama Brčko distrikta Bosne i Hercegovine.

Naime, kako je to naprijed navedeno, nosilac javne funkcije je samo ono lice koje je imenovano od strane Skupštine ili na čije imenovanje je saglasnost dala Skupština ili Vlada Brčko distrikta Bosne i Hercegovine.

M.G. kao šef Odjeljenja za evropske integracije i međunarodnu saradnju jeste nosilac javne funkcije u smislu Zakona o sprečavanju sukoba interesa u institucijama Brčko distrikta Bosne i Hercegovine, s druge strane, J.G., kao direktor Direkcije za finansije Brčko distrikta Bosne i Hercegovine nije nosilac javne funkcije te nema smetnje da J.G. obnaša funkciju direktora Direkcije za finansije Brčko distrikta Bosne i Hercegovine, te samim tim ne postoji ni sukob interesa u konkretnom slučaju.

Analogno prethodno navedenom, a u dijelu navoda iz prijave da Komisija ispita eventualni sukob interesa između R.M. i J.G., Komisija smatra da ne postoji sukob interesa ni u tom slučaju, budući da je R.M., nosilac javne funkcije, a J.G. nije nosilac javne funkcije, u smislu člana 2. tačka b) Zakona o sprečavanju sukoba interesa u institucijama Brčko distrikta Bosne i Hercegovine, te stoga se ima primijeniti obrazloženje kao i iz prethodnog pasusa.

Shodno navodima iz anonimne prijave a koji se odnose na izuzeće R.M., člana Komisije za odlučivanje o sukobu interesa u glasanju i odlučivanju u ovome predmetu, ista je izuzeta od glasanja i odlučivanja Zaključkom, broj: KSI-09-67/23 od 11.04.2023. godine.

Slijedom navedenog, Komisija je donijela odluku kao u dispozitivu odluke.

POUKA O PRAVNOM LIJEKU:

Saglasno odredbama člana 37. stav (1) Zakona, ova odluka je konačna u upravnom postupku i protiv iste nije dopuštena žalba, ali se može pokrenuti upravni spor u roku od 30 dana od dana dostavljanja odluke tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. Anonimnom podnosiocu
- putem oglasne table,
2. Internet stranici Komisije
3. Evidenciji i
4. Arhivi.